

Mwási Buku na Nzambe - Wives Scriptures

Baefeso 5:22-24 Basi, botosa babali na bino lokola bozali kotosa Mokonzi Yesu. 23 Mpo mobali azali mokonzi na mwasi na ye lokola Kristo azali Mokonzi na Lingomba. Kristo mpenza azali Mobikisi na Lingomba oyo ezali nzoto na ye. 24 Bobele boye, esengeli basi batosa babali na bango na makambo nyoso, na ndenge oyo Lingomba azali kotosa Kristo.

Baefeso 5:31 Lokola Buku na Nzambe elobi: "Mpo na oyo mobali akotika tata na ye mpe mama na ye mpo na kosangana na mwasi na ye, mpe bango mibale bakozala motu moko."

Baefeso 5:33 Kasi yango ezali koloba lokola epai na bino: esengeli motu na motu alinga mwasi na ye lokola nzoto na ye mpenza, mpe esengeli mwasi atosa mobali na ye.

1 Bakorinto 7:3 Ekoki mobali asala epai na mwasi lokola esengeli mobali asala, bobele bongo, ekoki mwasi asala epai na mobali na ye lokola esengeli mwasi asala.

1 Bakorinto 7:34 mpe ye akabolani na misala mibale. Bobele boye, mwasi oyo abali mobali azali kokangana na makambo na mokili, ye azali koluka kosepelisa mobali na ye. Kasi mwasi oyo abali te to elenge mwasi, azali kokangana na makambo na Mokonzi, mpo ye alingi kozala na nzoto mpe na molimo na ye mpo na Mokonzi.

Bakolosai 3:18 Bino basi, botosa babali na bino, mpo ezali bobele boye esengeli bosala liboso na Mokonzi Yesu.

1 Timoteo 2:11-15 Esengeli basi bazwa kolakisa na kimia, na komitia na nse mpenza. 12 Nandimi te ete mwasi alakisa to akamata esika na bokonzi likolo na mobali. Esengeli afanda kimia. 13 Mpo ete Nzambe ajalisaki Adamu na liboso, Eva na nsima. 14 Mpe Satana akosaki Adamu te, kasi akosaki Eva, mpe Eva atosaki motindo na Nzambe te. 15 Kasi mwasi akobika kati na kobota bana soki ye atikali kati na kondima, na bolingo, kozala petwa mpe na lolendo te.

Ebandeli 3:16 Ye alobaki na mwasi: "Nakobakisa mpasi na yo mingi na ntango ozali na zemi mpe na ntango ya kobota lokola. Okozala kaka na mposa ya mobali na yo, mpe ye akozala mokonzi na yo."

1 Petero 3:1,2 Bino lokola, basi, botosa babali na bino, boye soki mosusu na bango bandimi liloba na Nzambe te bakondima mpo na bizaleli na bino. Esengeli te boloba maloba, 2 mpo soki bamoni bizaleli petwa mpe botosi na bino, bakobika.

Tito 2:1-5 Kasi yo, lakisa makambo ekokani na kolakisa ya solo. 2 Loba na bampaka babali ete bazala batu na koleka mposa na nzoto, batu sembo, batu na kakanisa malamu mpe kotelema makasi kati na kondima, bolingo mpe na motema na kolemba te. 3 Bobele boye, loba na bampaka basi ete batambola lokola ekokani na batu oyo bazali kofanda na bomoi santu, ekoki te bazala batu na songisongi. Ekoki te bazala baumbu na masanga. Ekoki balakisa makambo oyo ezali malamu. 4 mpo na koyebisa bilenge basi ete balinga babali na bango mpe bana na bango, 5 kozala batu na kakanisa makambo, mpe batu petwa, batu na kobongisa ndako, batu malamu, kotosa babali na bango, boye motu moko te afinga maloba na Nzambe.

Maloba Mayele 12:4 Mwasi ya sembo apesaka mobali na ye lokumu, kasi mwasi ya kopesa nsoni azali lokola mpasi na kati ya mikuwa na ye.

Maloba Mayele 14:1 Mwasi ya mayele abongisaka libota na ye malamu, kasi mwasi ya zoba abebisaka yango ye moko.

Maloba Mayele 19:13 Mwana ya zoba ayokisaka tata na ye mpasi, mwasi ya makelele azali lokola ndako oyo etangaka ntango nyoso.

Maloba Mayele 21:9 Malamu ata ofanda na esika moke likolo ya ndako, esika ete olala na ndako monene elongo na mwasi ya koswana.

Maloba Mayele 21:19 Malamu ofanda ata na esobe, esika ete ofanda elongo na mwasi ya makelele mpe ya nkanda.

Maloba Mayele 25:24 Malamu ata ofanda na esika moke likolo ya ndako esika ete olala na ndako monene elongo na mwasi ya koswana.

Maloba Mayele 27:15,16 Mwasi ya makelele azali lokola ndako oyo etangaka mokolo mobimba na ntango ya mbula. 16 Kopekisa ye ezali lokola koluka kopekisa mopepe, to koluka kokanga mafuta na maboko.

Maloba Mayele 31:10-31 Mwasi ya motema malamu aleki mayaka ya talo na malamu. 11 Mobali na ye atiaka motema epai na ye,

mpe azangaka kozwa litomba te. 12 Mwasi yango asepelisaka ye; akoyokisa ye mpasi te na bomoi na ye mobimba. 13 Alukaka nkunza ya mpate mpe line, mpe asalaka yango na esengo. 14 Azali lokola masuwa ya batu ya mombongo; akendeke koluka bilei mosika. 15 Alamukaka liboso ete ntongo etana, alambelaka libota na ye bilei, mpe akabolaka mosala mpo na basali na ye ya basi. 16 Soki amoni elanga ya kotevisa, asombaka yango, mpe alonaka banzete ya vino na mbongo na ye moko. 17 Asalaka mosala na makasi na ye nyoso, atikaka maboko na ye efanda mpamba te. 18 Amonaka ete misala na ye ezali kotambola malamu; ata kino na butu apelisaka mwinda na ye mpo na kosala. 19 Maboko na ye emesenai na kolekisa basinga na ntonga mpo na kosala bilamba. 20 Afungolaka maboko mpo na bamosikini mpe asalisaka batu ya mawa. 21 Abangaka ntango ya malili te, mpamba te batu na ye nyoso bazali na bilamba ya kokoka. 22 Ye moko asalaka babulaneti, alataka bilamba ya line ya kitoko mpe ya motani. 23 Mobali na ye, bapesaka ye lokumu ntango azalaka na kati ya lisanga ya bankolo ya mboka. 24 Atongaka bilamba ya kotevisa, atekiselaka batu ya mombongo mikaba. 25 Makasi mpe lokumu ezali bilamba na ye, abangaka te mpo na mikolo oyo ekoya nsima. 26 Abimisaka maloba ya mayele; ayebi kopesa batoli ya malamu. 27 Atalaka nyoso oyo elekaka na ndako na ye, mpe alingaka kofanda mpamba te. 28 Bana na ye balobaka maloba ya malamu mpo na ye; mobali na ye akumisaka ye boye: 29 "Basi ya kokoka bazali mingi, kasi yo oleki bango nyoso." 30 Elongi ekosaka, kitoko esilaka; bobele mwasi oyo atosaka Nkolo nde bakoki kokumisa ye. 31 Bopesa ye litomba na mosala na ye; vile mobimba esengeli kokumisa misala na ye.

**Pastor T. John Franklin
Church of Salvation, Healing, and Deliverance
COS-HAD.org**